

मार्निंग डोगरी न्यूज़ बुलेटिन, समें. 09.20 Hrs

<><><><><><>

### Headlines

1. संसद दा बजट इजलास अज्जै थमां शुरू होआ'रदा ऐ, पैहले रोज राष्ट्रपति होर दौनें सदनें गी सांझे तौरा पर संबोधत करडन।
2. उपराज्यपाल मनोज सिन्हा होरें गणतंत्र दिवस-2026 दे सिलसिले च आयोजित अखिल भारती िंहंदी कवि सम्मेलन गी संबोधित कीता।
3. केंद्री मंत्री डॉ. जितेंद्र सिंह होरें गणतंत्र परेड च जम्मू-कश्मीर दी झांकी च शामिल कलाकारें ते टीम मिम्बरें लेई धाम दा सरिस्ता कीता, उंदी प्रस्तुति दी सिफत कीती।
4. जम्मू नगर निगम आसेआ अज्ज पैहली बारी तिव वोट फेस्टिवल दा सरिस्ता कीता जा'रदा ऐ।
5. जम्मू-कश्मीर दे 11एं जिलें लेई बर्फीले तूफान ते ल्हास पौने दी चेतावनी, जम्मू-श्रीनगर जरनैली सड़क अज्ज दुए रोज बी बंद।

-----  
<><><><><><>

### Parl. Budget Session

संसद दा बजट सत्र अज्जै थमां शुरू होग। इस सत्र दी शुरूआत संसद दे दौनें सदनें दी सांझी बैठक च राष्ट्रपति द्रौपदी मुर्मू हुं'दे संबोधन कन्नै होग। आर्थिक सर्वेक्षण कल पेश कीता जाहग ते केंद्री बजट ऐतवार 1 फरवरी गी पेश कीता जाहग। बजट सत्र दा पैहला चरण अज्जै थमां

13 फरवरी तगर होग ते दुआ चरण 9 मार्च थमां 2 अप्रैल तगर होग। इस दरान 30 बैठकां होडन।

<><><><><><>

### LG Kavi Sammelan

उपराज्यपाल मनोज सिन्हा होरें कल जम्मू-कश्मीर कला, संस्कृति ते भाश अकादमी आसेआ गणतंत्र दिवस समारोह दे सिलसिले च अभिनव थियेटर जम्मू च आयोजित अखिल भारती हिंदी कवि सम्मेलन गी संबोधित कीता। इस कवि सम्मेलन च देसै दे बक्ख-बक्ख हिस्सें थमां मन्ने-परमन्ने दे कवियें हिस्सा लैता। इस मौके उप्पर बोलदे होई एल.जी होरें आखेआ जे कविता लोकें गी जोड़ने लेई इक पुल दा कम्म करदी ऐ ते कवि अपनी कविता दी शक्ति राहें समाज दा अंदरूनी निर्माण ते सुधार करदे न। इस मौके उप्पर बोलदे होई उनें आखेआ

इस त्रै दिन चलने आहले समारोह च अज्ज अखिल भारती उर्दू मुशैयरा कीता जाहग ते कल इस समारोह दा समापन राश्ट्री डोगरी कवि सम्मेलन कन्नै होग।

<><><><><><>

### LG-IRS

उप-राज्यपाल मनोज सिन्हा होरें कल लोकभवन जम्मू च इंडियन रेलवे मैनेजमेंट सर्विस आफिसर ट्रेनीज कन्नै गल्लबात कीती ते उनेंगी आखेआ जे ओह आधुनिक भारत लेई तकनीकी

रेलवे बुनियादी ढांचे गी विकसित करने उप्पर ध्यान देन जेहदे च सेवा प्रदान करना, सुरक्षा ते दक्षता च सुधार आस्तै परिचालन, यात्री ते माल ढोआई दे आंकड़ें दा इस्तेमाल कीता जा। इस मौके पर बोलदे होई एल.जी होरें आखेआ जे स्मार्ट टेकनालजी ते मल्टीमॉडल लाजिस्टिक्स नेटवर्क, भारती रेलवे गी तेज, सुरक्षित ते यात्रियें उप्पर केंद्रित बनाने दी कूजी ऐ। उनें आखेआ

<><><><><><>

### MoS Tableau

केंद्री मंत्री डॉ. जितेंद्र सिंह होरें कल कर्तव्य पथ पर गणतंत्र दिवस समारोह च अपनी प्रस्तुति देने आहली जम्मू-कश्मीर दी झांकी दी टीम आस्तै इक गेट टूगेदर दी मेजबानी कीती ते उनेंगी उंदी सुंदर प्रस्तुति लेई बधाई दिती। इस झांकी च जम्मू-कश्मीर दी समृद्ध सांस्कृतिक विरासत, समुदायिक जीवन ते कलात्मक अभिव्यक्ति गी पेश कीता गेआ। इस मौके उप्पर मंत्री होरें कलाकारें, डिजाइनर ते अधिकारियें कन्नै गल्लबात कीती।

<><><><><><>

ते हुन बाकि दिएं खबरें कन्नै जगमोहन शर्मा।

### Tavi Boat Festival

जम्मू नगर निगम आसेआ सूर्ज पुत्री तवि नदी दे खब्बे कंडे भगवती नगर आहले चौथे पुल कश 'तवि बोट फेस्टिवल' दा सरिस्ता कीता जा'रदा ऐ। तवि नदी च किशती च बेड़यै नजारा लैने दा मौका देने आहला एह् अपनी किस्मै दा पैहला-पैहला आयोजन ऐ जेहड़ा फिलहाल अज्ज ते कल छड़ा दो दिनें लेई ऐ ते एहदा मकसद इत्थै दी सैलसफा समर्था गी उजागर करना बी

ऐ। जम्मू नगर निगम दे कमिशनर देवांश यादव होरें इस बारै आकाशवाणी कन्नै गल्ल करदे होई दस्सेआ जे इनें द'ऊं दिनें दरान किशती च सैर करने दी सुविधा मुफ्त होग। उनें लोकें गी आखेआ ऐ जे ओह दपैहरी मगरा साइडे 3 बजे कोला संझा साइडे 6 बजे तगर इत्थे आइयें किशती च सैर करने दा नन्द लैन। उनें आखेआ

<><><><><><>

### Rana Eco park

जंगलात ते पर्यावरण मंत्री जावेद अहमद राणा होरें मेंढर दी बेहड़ा थाह इक नमा इको पार्क बनाने दी घोशणा कीती ऐ। पर्यावरण संरक्षण ते इलाके च मनोरंजन सैलसफा गी बढ़ावा देने दे मकसद कन्नै बनाए जाने आहले इस पार्क दे निर्माण पर अंदाजन कोई 45 लक्ख रपे दा खर्चा औग। मंत्री होरें एह गल्ल कल लोकें कन्नै मलाटी आहले इक कार्यक्रम दरान आकखी जिस दरान इलाके च मैहकमा पी.डब्ल्यू.डी आसेआ तोड़ चाढ़े जा'रदे सड़क निर्माण ते सार्वजनिक सुविधाएं दे कम्में दी प्रगति ते रफ्तार दा बी जायजा लैता। इस दरान मकामी लोकें इलाके दे सेवाएं ते नागरिक सुविधाएं सरबन्धी अपने कई मुद्दे मंत्री हुंदे अग्गे रक्खे जिनेंगी धरोइयें सुनने परैंत उनें उन्दे पैहल दी विनाह पर नबेड़े दा यकीन दोआया।

.....बाईट.....

<><><><><><>

### Snowfall

जम्मू-कश्मीर दे ज्यादातर पहाड़ी इलाकें च पिछले किश दिनें दरान होई दी भारी बर्फबारी दे बाद सैलानी थाहरें पर सैलानिएं दी आमद च बाददा दिक्खने गी लब्बै करदा ऐ। जम्मू प्रांतै दे बी केई पहाड़ी इलाकें च सैलानी बर्फ दा नजारा ते मौसम दा नंद लैने गितै आवा करदे न। बर्फ नै खटोए दे पहाड़ें, इत्थूं दे खूबसूरत कुदरती नजारें गी होर मता सनाखड़ा बनाई दिते दा ऐ। कन्नै लगदे राज्यें थमां बी लोक चाएं-चाएं इत्थै आए दे न। अपनी खुशी प्रगट करदे होई किश सैलानिएं दा आखना ऐ।

<><><><><><>

### Avalanche Warning

जम्मू-कश्मीर दे 11 जिलें लेई अज्ज बी बर्फ दे ल्हास तोदे पौने दी चेतावनी जारी कीती गेदी ऐ। तोआई, कल रातीं सोनामर्ग च बी उप्परलियें धारें प बर्फ दा तूफान ते ल्हास पौने दी खबर ऐ। कश्मीर घाटी दे 6 जिलें लेई रेड अलर्ट ते जम्मू प्रांतै दे 5 जिलें लेई ओरेंज अलर्ट जारी कीता गेदा ऐ जिंदे च जम्मू दे डोडा, किशतवाड़, पुंछ, राजौरी ते रामबन जिले ते कश्मीर दे अनंतनाग, बांडीपोरा, बारामुला, कुलगाम, कुपवाड़ा ते गांदरबल शामिल न। एह चेतावनी अज्ज संझा 5 बजे धोड़ी लेई ऐ जिस दरान लोकें गी मता सौहगा सतर्क रौहने लेई आखेआ ते उनें इलाकें च भलेआं नेई जाने दी सलाह दिती गई ऐ जित्थे ल्हास तोदे पौने दी शेंका बनी दी रौहंदी ऐ। लोकें गी आखेआ गेआ ऐ कि कुसै बी आपात स्थिति च ओह 112 नंबर पर संपर्क करन। मौसम विभाग दे इक अधिकारी दा आखना ऐ

<><><><><><>

### Traffic Update

जम्मू-श्रीनगर राश्ट्री जरनैली शिड़क गड़डियें दी आओजाई लेई अजें बी बंद ऐ ते कुसै बी गड़डी गी जम्मू थमां घाटी जां घाटी थमां जम्मू बक्खी जाने दी इजाजत नेई ऐ। प्रशासन नै लोकें लेई सलाह जारी कीती ऐ कि ओह रस्ता साफ ते सड़क खुल्लने तगर सफर लेई नेई निकलन। लोकें गी आखेआ गेआ ऐ कि ओह अफवाई पर ध्यान नेई देन ते मकामी ट्रैफिक कंट्रोल इकाइए कन्नै संपर्क करियै या उन्दे सोशल मीडिया मंचें पर ताजा जानकारी पर गै यकीन करन। सड़कें परा बर्फ हटाने दा कम्म जारी ऐ।

<><><><><><>